



## Jakhama nung Nagaland Potato benjung mungogo



**Dimapur, Monupii/May 10 (TYO):** Mezüngbuba Nagaland Potato festival May 10 nü Kohima district kübok Jakhama local ground nung mungogo. Nagaland nung adokba organic chiyongtsü aser state nung tsünüteba alo ajungkettsü nükjidong nung iba sentong ayongzüka mungogo. Sentong nung

Commissioner of Police Dimapur, Kevithuto Sophie alakteta jaoker liasü. Sentong nung o jembiba mapang Sophie-i, par yimtsüng nung alo tsünüba aser ayaba indang tajangshibatem lemsatepa liasü. Paisa, southern Angami nungertem nem alitemo maotsüogo, ta ashi. Kasa mapang nung Senior

Scientist & Head Incharge ICAR-CRRI (RS) Shillong Dr. N. Sailo-i, alo tsünütsü atema scientific method tem metetdakja liasü.

Sentong ya Visakunu Tetso lenisüba nung agi aser Pastor John Zao-i sarasadem aser District Agri. Officer Kekhrieletuo Yhome-i lokti pela agizükba o jembiba liasü.

## Dimapur nung Melorra Experience Centre amenokogo

**Dimapur, Monupii/May 10 (TYO):** Dimapur nung May 10 nü T.K Building, City Tower, Tajen Ao Road nung Melorra Experience Centre lapokkogo. Dimapur nung lapokba store densema India nung Melorra store 34buba lapokkogo aser iba ajanga linük nung trendsetting jewellery tem agütsütsü asoshi parnok bendanga agütsür aliba sayur.

design shia ya masterpiece kaka lir, koba jewellery agütsütsü atema dang masü saka shishirtem nem tajangshiba tajung agütsütsü asoshi lir ta ashi.

Kasa mapang nung Melorra Promoter, Shantaram-i Nagaland nung iba centre lapoktetba atema parnok kanga pelaba lemsatep. Paisa, Melorra indang Hon aser Diamond agi yangluba jewellery tem indang collection saya, koba sentong balala atema aser nisungshia pei taginüba dak ajemdaker yangluba lir, ta ashi.

Shantaram-isa, Melorra nükjidongji international fashion agi ajungmesoba jewellery tem ajaki tuzüktettsüsa yanglutsü

asoshi lir, aser parnok indang design shilem 70 bo sen 50,000 tekübok lir, ta ashi.

Sentong nungsa Advisor for Transport and Technical Education Temjenmenba-i, centre takok ngua lapoktetba atema tenüngsang agütsüba den, iba ya store ka dang masü saka kibongtem atema kinungertem külemi jewellery tem asadanga aotsü asoshi tesem tajung ka asütsü, ta ashi.

Iba sentong nung H. Tovihoto Ayemi, Advisor for Tribal Affairs & Elections kinungtsü Amitoli Sema tetushi tejaoker liasü.

Melorra Experience Centre nung sentong balala atema yangluba design 17,000 dak tema angütsü.

## GHSS Chumoukedima & RGHSS-i school choir competition kokogo

**Kohima, Monupii/May 10 (TYO):** Samagra Shiksha-i ayongzüka Ibuba State Level School Choir Competition Government Higher Secondary School (GHSS) Chumoukedima aser Razhukhrie GHSS nati kokogo. Iba tetoktepba ya RCEMPA Jotsoma nung agia liasü.

National Education Policy (NEP) 2020 ya tanur/kaketshirtem lenla ajak nung terenlok atema rangloker lir ta ashi.

Idaki music ya art nung shilem ka lir, ta lai ashiba den Samagra Shiksha kübok state sorkari secondary government schools 46, GHS ana aser GHSS 44 nung nung music program benokdar ta ashi.

Laisa, 2018-19 küm pilot project ka ama Samagra Shiksha-i school 46 nem musical instruments tem agütsü, aser item school tem nungi 10 bo tanü idaki shilem agidar, ta ashi.

Kasa mapang nung, Commissioner & Secretary Kevileno Angami-i, kaketshirtem nem parnok sempet sayutsü atema maangka agütsüba atema Samagra Shiksha Nagaland dang kanga pelaba lemsatepa liasü.

Joint Mission Director Smagra Shiksha Dr Bijano Murry lenisüba nung iba tetoktepba agi aser Mission Director Samagra Shiksha Dr

Kevizakie Rio-i tepela o jembiba liasü.

Tetoktepba tetendangertem rongnung Vimezo Iralu, Music Director UBC Kohima; Zareni Yanthan, Music Director Lotha Baptist Church Kohima aser Vini K. Chishi, Vocal Instructor, Nagaland College of Music & Fine Arts, Kohima nung densema liasü.

Iba tetoktepba nung GHSS Senayangba - Ao folk song, GHSS Dimapur - Sumi folk song, Dr Neilhouzhü Kire GHSS Seikhazou - Lotha folk song, Razhukhrie GHSS Kohima - Angami folk song, GHSS Diphupar - folk fusion incorporating 8 Naga dialects, GHSS Chozuba - Chakhesang folk song, GHSS Thangjam, Tuensang - folk fusion, GHSS Bhandari - Lotha folk song, GHSS Chumoukedima - Sumi folk song aser NI Jamir GHSS Mokochung - Ao folk song; nungeri shilem agia liasü.

School ajak national anthem tetoktepba nung shilem agia liasü.

## Mon nung District Level Export Promotion Committee (DLEPC) senden ayonger

**Dimapur, Monupii/May 10 (TYO):** Deputy Commissioner Mon, Ajit Kumer Verma-i sangdong ka ajanga, District Level Export Promotion Committee (DLEPC) senden May 13 nü amentsü ta metetdaksüogo. Iba senden ya 2:00 ako nung tenzüka Deputy Commissioner, Mon Conference Hall nung amentsü. Anungji iba senden nung

Project Director, DRDA; District Horticulture Officer; District Agriculture Officer; District Soil Conservation Officer; District Project Officer, Land Resource Department; Manager, Lead Bank (SBI) aser General Manager, District Industries Centre nung ajak tamakok maludaktsüi arua shilem agitsü mepeshia metetdaksüogo.

## Mon DC-i Child & Adolescent Labour Act training indang metetdaksü

**Dimapur, Monupii/May 10 (TYO):** National Commission for Protection of Child Rights kübok Deputy Commissioner Mon, Ajit Kumar Verma, IAS-i züngsem ajak dang Child and Adolescent Labour (Prohibition and Regulation) Act, 1986 dak sendakba nung District Task Force (DTF) atema Online Training Program ka agitsü aliba metetdaksüogo.

Iba dak sendakba nung teküboklen agüja aliba züngsem ajak dang May 14 nü 3:00 ako nungi tenzüka online training sentong nung shilem agitsü metetdaksüogo.

1. Shiluwabang I. Longkumer, Superintendent of Police, Mon.  
2. K. Temjennaro Longkumer, Additional Deputy Commissioner, Mon Hq.

3. Zgoi Lohe, Additional Deputy Commissioner, Tizit.  
4. Zhubenthung Ngullie, Additional Deputy Commissioner, Naginimora.

5. Phuleshe K Yephthomi, Additional Deputy Commissioner, Aboi.

6. Shaying Sheu, Additional Deputy Commissioner, Tobu.

7. T. Yanlem, District Welfare Officer, Mon.

8. Sevehu Chuzho, District Child Protection Officer, Mon.

9. Moala Aier, District Education Officer, Mon

10. Changkup, Labour Inspector, Mon.

11. Ilam Lungalang, Additional Superintendent of Police, Mon.

12. Dr. Imnapokim, Chief Medical Officer, Mon.

13. K. Topha, Panel Lawyer.

## Wokha Dist. administration-i HSLC topper tem nem tetushi agütsü

**Dimapur, Monupii/May 10 (TYO):** Wokha District Administration-i ayongzüka May 10 nü Deputy Commissioner Office, Wokha nung HSLC topper tem nem tetushi agütsüba sentong ka agiogo.

Iba sentong ya tawa sangdongba HSLC tatidang result nung takok tajung angurtem nem tetushi agütsütsü atema ayongzüka liasü. Tetushi agütsüba kaketshirtem rongnung Isaiah Higher Secondary School (top 7th) nungi Nchumbemo Lotha, Libemo Memorial School (top 14th) nungi Ruth Y Lotha, Libemo Memorial School (top 17th) nungi Meriyani C Humtsoe aser Libemo Memorial School (top 17th) nungisa Zaren Taslim Khandakar nung densema liasü.

Tetushi agütsüba sentong

nung kaketshirtem den jembiba mapang Deputy Commissioner, Wokha Ajit Kumar Ranjan-i, school aser district atema tenüng tajung bener arutsü asoshi kaketshir pezü nem ya tenüngsang agüja liasü.

Paisa, parnok dang maneni meranga inyaktsü aser tarutsü nunga konang aser tetushi bener arutsütsü ajungshiba den parnok nükjidongtem jangrabangra bushitsü aser taküm nung khuret angatetba lisopur kaka akümtsü ajungshi. DC-isa, kaketshirtem kanga junga anitetba aser ajungmesoba atema school administration nem tenüngsang agüja liasü.

Iba sentong ya SDO (C), Wokha Nuhuta Tunyi lenisüba nung agia liasü. Takok tajung anguba kaketshirtem nem sempet balala agüja liasü. Sentong nung tsürapurtem aser kaketshirtemi shilem agia liasü.

## Chozuba town council election atema ADC-i senden ayong

**Dimapur, Monupii/May 10 (TYO):** Taruba Town Council election dak sendakba nung Additional Deputy Commissioner (ADC) cum Returning Officer, Chozuba Town Council Dr. Diana Patton-i, sub-division indang officer tem senden ka May 10 nü pa indang office chamber nung ayongzüka menogo. Senden nung Returning

Officer-i, ketdangsurtem dang staff tem indang list ADC, Chozuba office nem agütsütsü tetuyuba agüja liasü.

Temetettsü kaji Chozuba Town Council kübok Wards teku lir aser election takok ngua agitettsü atema presiding officer teku nungdaker. Senden nungsa election atema nübu kwi nungdaktsü, iba indang sensaksema liasü.

# Ochiji tamakok ngudaktsütsü makok: Aam Aadmi Party



May 10, 2024 nü New Delhi nung AAP lenirtemi osangbenertem den jembidang tangokba noksa nung angur.

**New Delhi, Monupii/May 10 (Agencies):** Hokolbarnü Supreme Court-i Delhi Chief Minister, Arvind Kejriwal nem interim bail agütsüba sülen Aam Aadmi Party (AAP)-i, ochiji tamakok ngudaktsütsü makok, ta metetdaksü.

Ajisüaka Supreme Court-i Kejriwal pa indang office mesüra Delhi secretariat-i aotsü memelar aser Delhi lieutenant governor dang nungi tama temelaba magiibo official documents kecha nunga sign masütsü tuyugo.

Lok Sabha election atema nüboyimtsü asoshi Court-i Kejriwal nem anogo 21 bail agütsür chioker. Delhi excise policy ken o dak sendakba nung pa apuba sülen anogo 50 shi judicial ket nung liasü. Court-i Kejriwal dang Lok Sabha election tembangba sülen tasüngnü (June 2) nü ketdangsertem matsüngdangi arung, ta tuyu.

Arvind Kejriwal kinüngtsü, Sunita-ia X ajanga nüburtemi nungita yariba atema pelaba lemsatep. Lai X ajanga, "Iba ya

democracy takok lir. Iba ya nisung million aikati sarasademsüba aser moatsüba ajanga lir. Ajak dang kanga pelar," ta metetdaksü.

Supreme Court-i Kejriwal nem bail agütsüba sülen AAP lenirtem- Gopal Rai, Saurabh Bharadwaj aser Atishi nungeri osangbenertem senden ka ayongzüka amen.

Delhi Minister Atishi-i, "Iba ya puti otsü anogo ka lir, AAP atema dang masü saka linük atema puti otsü anogo ka lir. Kijai yimsüsüba linük ka kumdaktsütsü atema BJP-i ajak inyaker. SC telemtetba ajanga kijai yimsüsüba anentsütsü, ta nüburtem nem teimla agütsür. Iba ya democracy aser linük temzüng takok lir," ta metetdaksü.

Rajya Sabha nung AAP MP, Sanjay Singh-i social media ajanga, "Ochi timtemdaksütsü akok saka tamakok mengudaktsütettsü. Supreme Court telemtetbaji pelaa agizüker. Kijai yimsüsüba tatemang kati arutsü. Satyamev Jayate," ta metetdaksü

Delhi Minister aser AAP lenir, Kailash Gahlot-i, "Ochi temeden agütsüba atema ni Supreme Court dang pelar. Election ji küm 5 nung khen dang arutsü, anungji party ka nung tongti lenir kaji nüburtem den alitsüla aser pa tebilemba lemsatepsüji tongtibang, ta SC-i angateta iba oabendang agütsü. Iba ya ochi atema takok ka lir," ta ashi.

ED-ibo Kejriwal bail anema nokdak, ajisüaka Supreme Court-i, anogo 21 interim bail agütsüba ajanga kecha balaka masütsü, ta metetdaksü.

SC-isam ED indang Enforcement Case Information Report (ECIR) ji 2022 küm August nung benok saka taküm March 21 nungang Delhi chief minister apu, ta ashi.

SC-isa, Arvind Kejriwal anema tai tulu tonglokja lir, ajisüaka tang tashi nungbo pa maitsü, iba dak alia tesüiba mapangtem nung Kejriwal-i ozüng alema kecha meinyak aser pa ya loktiliba atema amokmeren ka masü, ta metetdakja liasü.

# Praful Patel-i Rajya Sabha MP tenangzükba agi



May 10, 2024 nü New Delhi nung NCP lenir, Praful Patel-i Rajya Sabha MP tenangzükba agiba sülen tangokba noksa nung angur. Kasa noksa nung Rajya Sabha Chairman, Jagdeep Dhankhar-a angur.

**New Delhi, May 10 (Agencies):** Hokolbarnü NCP lenir, Praful Patel-i Rajya Sabha MP tenangzükba agiogo; iba sentong nungji Rajya Sabha Chairman Jagdeep Dhankhar liasü.

Taküm February 21 nü Rajya Sabha election nung Patel

den tetokteper candidates malibayong pa shima liasü.

Patel-i X ajanga, "Linük tatong tir, Jagdeep Dhankhar matsüngdang tanü Rajya Sabha MP tenangzükba agibaji akhüm tulu liasü," ta metetdaksü.

Patel-i tang agi trokbenbuba Rajya Sabha MP tenangzükba

agiogo. Pa Lok Sabha nunga term pezüben tashi MP inyaka liasü. Yaküm July ita nung Patel-i Ajit Pawar den longjemer NCP MLA tem aikati party tokja liasü. Iba sülen Election Commission-i Ajit Pawar-i aniba telok ang chichiba NCP lir ta agizük.

# Chhattisgarh state nung

## sepaitemi Maoists telungpur 12 khaset

**Bijapur, May 10 (Agencies):** Hokolbarnü Chhattisgarh kübok Bijapur district nung sepaitemi Maoist telungpur 12 khasetba sülen Chief Minister, Vishnu Deo Sai-i sepaitem aser sepa ketdangsertem nem tenütsang agütsü.

Pidia village yim anasa security sepaitemi telungpurtem mita aoba mapang nung telungpur 12 khaset, ta police ketdangser kati metetdaksü.

Hokolbarnü Chief Minister Vishnu Deo Sai-i, "Bijapur district kübok Gangaloor area nung sepaitem aser Maoists telungpurtem tsüngda khatepba sülen telungpur tasümgang 12 ngutetogo. Ni asen sepaitem aser sepa ketdangsertem nem tenütsang agütsür," ta metetdaksü.

Tawa state kübok Kanker nunga sepaitemi Maoists telungpur 29 khaseta liasü. Lok Sabha election tenzüksü anogo

ishika dang lia April 16 nü Maoists 29 khaset.

Iba mapang nungji Border Security Force (BSF)-i sangdong ka ajanga, Binagunda aser Koronar yim na tsüngda Hapatola arem nung BSF aser state police District Reserve Guard (DRG) na senteper telungpurtem mita aodang telungpurtem den rara tenzüka khatepba sülen raraba tesem nungjagi Maoists tasümgang 29 den AK series rifles tenet aser Light Machine Guns asem angu, ta metetdakja liasü.

Union Home Minister Amit Shah-i, Ato kilonser Modi lenisüba kübok sorkari linük nung Maoists meshimeshia samatsütsü, ta mapang shia jembia arur.

Maoists telungpurtemi timtem agütsüba tesem- Bastar nung April 19 nü election agi aser Kanker constituency nunga April 26 nü election agiogo.



May 10, 2024 nü Nandurbar, Maharashtra nung Lok Sabha election nüboyim sentong ka nung Ato kilonser, Narendra Modi nem sempet ka agütsüdang tangokba noksa nung angur.

# Rajasthan aser Kerala na dak alaka state aika nung tzünglu arutsü: IMD

**New Delhi, May 10 (Agencies):** West Rajasthan aser Kerala na dak alaka linük tesem aika nung tzünglu arutsü, ta India Meteorological Department (IMD)-i metetdaksü.

"Linük tesem tulubaka nung kanga tatsük süngjemtsü. West Rajasthan aser Kerala na nung ang kanga tatsük asütsü," ta IMD scientist Soma Sen-i metetdaksü.

Tenem aliba state kar aser northeast tesem kar nungbo tzünglu sashia arutsü aser tsüngi kanga aitsü, ta weather department-isa metetdaksü.

"Uttarakhand, Himachal Pradesh, Bihar, West Bengal, Odisha, Jharkhand, Assam, Meghalaya, aser anasa aliba state tem nung tzünglu sashia arutsü aser tsüngi aitsü," ta lai metetdaksü.

# Election shilem 4buba nung candidate 360 anema ken o benoka lir

**New Delhi, May 10 (Agencies):** Lok Sabha election shilem pezübuba nung tokteptsüpur candidate 1,710 lir aser iba nungjagi candidates 360 (shilem 21) anemabo ozüng alema inyakba ken o balala benoka lir, ta Association for Democratic Reforms (ADR)-i metetdaksü.

Yimtenren party tem rongnung AIMIM party candidates asemprong anema ken o benoka lir,

Shiv Sena candidates asem nungi ana anema ken o benoka lir, BRS candidates 17 nungi 10 anema ken o benoka lir aser Congress candidates 61 nungi 35 anema ken o benoka lir.

BJP candidates 70 nungi 40 anema ken o benoka lir, TDP

candidates 17 nungi 9 anema ken benoka lir, BJD candidate pezü nungi ana aser RJD candidates pezü nungi ana anema ken o benoka lir. Iba osang ya candidate tem-i agütsüba affidavit ajanga jangja.

Shivsena (Uddhav Balasaheb Thackeray) candidate pezü nung ana aser YSRCP candidate 25 nungi 12 anema ken o benoka lir.

AITC candidates 8 nungi asem aser SP candidates 19 nungi tenet anema ken o benoka lir.

State tem sasep nung candidates teimtiba anema ken o benoka aliba state ji Telangana lir; iba state nung candidate 524 nungi candidate 104 anemabo ken o balala benoka lir.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 11, 2024

### Auer-ashir tali bolur

Tanü asüng mapa inyakdak auyaba dang masü saka tarendaktsü aser tetsübuttsü kaji , talisa, Dimapur ama nisung longsua senzusenpong asüdak auer kanga bolua kümogo. Item auertemji, asenok tia junger majung ka, Naga nunger masü tzümartem lir. Ajisüaka, ano lendongbo idakji tuluba keta lir, kechiyong tzümartem jagi nisung dak tapayu mali sotaktsü aser tzümaleni jena aotsü. Item auertem ya kibur dang miima auyatsü merangba auer telok dang masü saka kibur ket nungi senotsü tashiyim agi rakzüka bener aotsü merangba rakzükratemer telok lir. Item rakzükratemer telok nung ya nisung anasemka dang asütsüa akok , anungji parnok senzübaji shingaia auer aser rakzükratemer nisungtema ta tebilema mebilemstsü. Parnok yagi, talisa, sen ayudak aser agizükdak bank nung nisungtem sen agizüki aruba ataa alitsü. Parnok rongnung mapa alemstsü , anungji nisung ka bank telong nung sen ayur aser agizükertem den külemi paa sen ayutsü mesüra agizüksü amai sayutsü aser iba nisung jagi bank nung sen agizükertem repranga atatsü. Idangji, kimalen parnok rongnung nisung ka ana atatsü. Iba ama mapang ka nung kodang bank telonglenji nisung kar sen tulujunga aika agizüka ngudir, iba auersangji iba nisung sülen anidaka bank nungi meyipa kimaleni alutsü aser kimalenji ano gari matong tsüngda tetsüng agi ooya alidang tesülen nungi tekong nung tamtsü mesüra tanaknüsü mozü tesashi kar enoktsüsüa akok, iba timtemji marem temang mienpronga alidang kimalen ataa aliba auersang to agi sen yangkuji rakzür parnok külemi ajentsü. Ano, auertemi inyakba tasa kaji, sen agizüker ooya alisang tsüngdangji sen kar tsüka sayutsü aser iba senji shiba indang ta jembitepdang sen yangkuji rakzüka bener aotsü. Item tasatemji dang masü saka ano item auertem jagi asen agizüker oa alisang tesülen tula menentsüsa mozü tzü langka ka rüloktsüsü aser 'nabo tesülen tula menena lir' ta sayutsü meranger amai ser senji rakzüka bener aotsü. Ano, auertem jagi nisung kar sülenbo ki tonga anidaktsü. Parnok ket nungji nisung yirutsüsü aser tepsettsü merang techira bener senzür. Kangasa tekümdangtsü aser yakyaka alitsüba kaji, item auertem jagi melamelaa amokbangtetsüsa tantsür-tambur aser nisung taintem dang nükpetsa repranga atar aser parnok dak nung jagi rakzükratemstsü meranger. Item auertem yagi bank telong nung dang masü saka kima yimdong nung ATM booth akadak anasa sen agizüki arurtem repranga atar amaker. Ano, kasa auer aser rakzükratemertem yagi telok nungtepa shishilemba dak mejepboker aser kibur memetet sen amuzüksü, rakzüksü aser sen juli dena mejepzüka bener aotsü meranger. Kasaji train nung jajadanga ataloktsü. Item ashir-auer aser rakzükratemertem ket nungi kümzüka alitsü asoshi, talisa, bank-i sen agizüki aodang nisung ajak kanga jetperaa aser kümdanga reprangshirang asütsü nüngdaker. Talisa nisung tain aser tantsür tamburtembo akok tashi pei kija bank asüyonga ATM-i asüyonga sen agizüki maoang tajungba, kechiyong sen rakzüka aotsüba lendongji dang masü saka item rakzükratemertem jagi taküma samatsüsü. Atangji, item ashir auer aser rakzükratemertemji aputsü atema yimti nung mitkartemi mita atar ,ajisüaka parnokji mitkartem dang nungi tekümdangba aser tekaraba, anungji mebushir. Iba jagi mitkartema ano auertem dang nung jagi tali teyakyakba aser tekümdangba nung parnokji aputsü tasa aser sentongtem yanglua inyaktsü nüngdaker. Atangji, auer aser rakzükratemertem mesoba agi nübortem yimti nung sen bener senzü majung akümba tensa tiaji mitkartem kisüngi makoktsüa akok, anungji nübortemia iba tongpang nung shilem agitsüla. Aji oda, yimti nung jajar senso shiai auer-ashir aser rakzükratemertem nungi jenbua alitsü asoshi dang mebilemi, parnokji aputsü terenemba nung nisung ajaki bilema senzüra, yimti nung ashir-auer aser rakzükratemertemji nübortem tsüngdang mejenbuttsü.

## OLEMSABANG

### Aotsür Aor libaliro khen meyipa reprangshitsüla

L. Kika Pongener


*(Yashi adok nungi...)*

Ano tanü tema-telung sorkar nunga asen Aor kechi jenjang nung nokdaka lir...??? Tekolak-len asü mesura tepen-len nokdaka lir...???...ta khen shisadangdi. Ano tanü Nagaland Government nungji Bureucrat Aotsür Aor kwika nokdaka lir...??? Hau-niii, Senior Gazeeted Officer-temi anir Junior Gazeeted Officer ishikabo alitsü sudi, saka Head of the Department kwika nokdaka lir...??? Aotsür Aortem teshisadangtsü terabo lir masü na...??? Surabangla, asüngji Aotsür Aor kechi jenjang ka asütsü (?) ta asenok ajaki khen arok-aroka shisadangdi. Ajak dak alaka, asen Aotsür Aor dak aketba tenukmerem mokokachi shisatsü ya endoktsüla. Kati ka jenjang junga aliba mereprangnui attsüzüka yutsüsü merangba shisatsü ya endoktsüla, ibaji arok akoksar ta metettsüla. Ano Aotsür Aor-a Political Party kar nungbosa tekolak asütsü atema kati ka nungita yariteptsüla. Linuk tenzükba mapa nunga, telok ka nungbo Aor-a tekolak sur anitsüsa kati ka nungita yariteptsüla. Küyi (Tiger) Tzüko-bo talang nungi arrloktsüyongjia mimchirtemi dena atendena tsübor ako...Anungji Aotsür Aor-a Party ka nungbo tanir (Leader) sur...Küyi Tzüko amai tangari tsübotsüsa arru-a amentsüla...Kechiba tangar sulen ola madoki tekong angumdena anidaktsü...??? Rulling Sorkar nung adenera ta tazüngla nung amendang nungibo 'Opposition Leader' sur 'Cabinet Status' nung Cabinet Facilities ngua amenba tajungba masü na...??? Aseni tenuk yoka reprangba agi sorkar tekolakpur-jia sadem-sadema mementettsüsa asenji alitsüla. Aser aoksa-a ka sorkar nung temelenshi ka arura...Aor-a kenubo tekolak shilem agi atatsüsa mimong mesema atatsüla aser kati ka nungita yariteptsüla. Anungji Aor Elected Member-tem ajaki asen kin dak sendakba maparen nungpo Party sentsü (Colour) kecha mapi-i Tatar ajak ka küma longjemtsü ajongshir.

Ano Dimapur jila ama, shinga kin jurila meyong jila masü, Naga nunger arok meyong District ka nung, shishilempaba mapatong (Business Establishment) tongti-ret kar nungbo Aotsür Aor kibur asüba lir mali...??? Tatishitsü...Shopping Mall/Market, Car Show-room, Petrol/Desiel Pump (B.O.C), Gas Agency/Dealer, Goods Whole Saler, Private Entrepreneur, Factory/Industry/Mill Owner, Schools, Colleges, Institutions, Hospitals Owner/ Proprietor, etc. yamala shishilempaba tongti-ret tulu nung Aor kibur asüba kwika lir...??? Govt. Regd. Contractor & Supplier (Class-1) kwika lir...??? Aotsür Aor takar tetsüdi Crore-Patti kwika lir...??? Aotsür Aor ki tulu/talang atongtepa sua akar ita shia para (Rent) lakh junga/tema angur kwika lir...??? Aotsür Aor-ji lenla ajunga nung samanir ta jembir...Surabangla, jembiba amaji tanüa lenla kar nungpo kibur lir mali...??? Anungji akhidang aliba otsüji khen toktsür tang koda lir (?) ta shisadangdi. Asenok khen zünyangshir apusotsü mapang kati menepogo. Joko, asenok kidong, yimtsüng, tzükong apia arishitepa alitsüba mapang masü, saka Aor senso ajak longjemer kati ka nungita yaritepa tejakleni aotsü merangtsüba mapang kati menepogo. Aotsür Aor senso tajungtem...Ano ita ka sulen Municipal Election agitsü lir-ji...Dimapur, Chumukedima aser Kohima ama jila nung Aor Ward kar nungpo Member adoktsü renema atatsü ajongshir. Aji oda, Aor Ward kar nung tangar kin den meyoktepa Contest asütsüsa sura...Aor ana-asek külemi metoktepi kati ka nem yimli agütsüteptsüla. Dimapur, Chumukedima & Kohima jila nung akümdong asütsü Aor Elected Member karbo alitsüla...Anungji Aor longjemer Municipal Member karbo adokdaktsüsü renema atadi. Ano tarutsü nungpo Dimapur nung MLA Seat tang akaba den ano talila kabosa akatsü atema Aotsür Aor aroki longjemer inyaktsü tang nungi renemshia atatsü ajongshir.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Gospel for Asia tentetsang KP Yohannan alima nungi pilaogo



KP Yohannan : 1950 - 2024

**Pathanamthitta (Kerala), May 10 (Agencies):** Gospel for Asia tentetsang aser Believers Eastern Church nung Metropolitan, Athanasius Yohan (KP Yohannan ta ajar) US nung gari lendong ka nung kanga mejungi yiruba sülen temelungjang tashidak agi süogo; pa arrshi küm 74 liasü.

"Gari lendong ajuruba sülen pa Dallas, Texas nung aliba hospital ka amongba mapang temelungjang tashidak agi asü," ta Bodhbarnü Arogo nung putir aser otongdar, Sijo Pandapallil-i metetdaksü.

Anepdang pa jajaa senzüba mapang nung gari kati pa dak tsükoktsüba sülen nungi pa Dallas nung aliba hospital ka nung ICU nung temongdak lia May 8 nü asü.

"Tongti putirtem, putirtem aser tamangertemi mangyima iba osang sangdonger- asenoki meima aliba Metropolitan, Athanasius Yohan tanü May 8 nikongdang Kibuba dangi ogo. Pa gari lendong nung yiruba sülen Dallas, Texas nung aliba hospital ka nung temongdak mapang temelungjang tashidak agi asü. Kobi melii Holy Synod-i osang tejangja metetdaksü," ta Believers Eastern Church-i facebook post ka ajanga metetdaksü.

Mongolbar nikongdang 5:25 ako (IST) nung Yohan jajazüa senzüba mapang nung iba lendong ajuru. Teti agia pai anepdang believers' church campus nung jajazüa senzür, ajisüaka lendong atalokba anogo nungjibo pa nisung jajatsü lenmang maliba county road ka nung tejajadak liasü.

Lendong atalokba sülen Yohan tepokpok surgery agi aser ghonda 24 medical observation agia liasü.

Iba lendong atalokli police ita tesem jagi aoba sülen pa tayimsü ka ajanga Dallas nung

aliba hospital kati anir oa liasü. Pandapallil-i, iba ken o ya gari agi tsükoktsür ajenba ken o ka masü mesüra nisung kar dak temelung malemtsüsa masü, ta metetdaksü.

K P Yohannan ya 1950 küm Kerala state kübok Thiruvalla anasa Niranam yimda aso. Pa high school azünga sülen pai akümüli piyong Tsüngrem tenzüksü atema pa taküm bendanga agütsü.

Arogoi sangdong ka ajanga, "Kibuba Yisu Khristai tenyaba wadang tashi angatsü pai lemtet, iba sülen pai küm 8 tashi Khrista osangtajung prok aser South Asia nung charity mapa inyak," ta metetdaksü.

1970s nung pai US nung theological training agiba sülen pai missionary organisation ka tenteta liasü, aser tangbo iba organization ji Asia nung aliba linük aika nung missionary aser Arogo aser tenzüksüba organization tuluka aküm.

2003 küm February 6 nü pa meshiteta Believers Eastern Church nung Metropolitan shima liasü.

Orthodox Christian inyakyim dak sendakba nung pai St. Athanasius aser Yisu nütsüng Yohan na nem akhüm agüja pa tenüng 'Athanasius Yohan' ta jaa tenüng tasenba amshi.

Pa lenisüba kübok tesüiba küm 20 tsünga Arogo kanga inloka Asia aser Africa na nung Arogo 12,000 dak tema amenokogo.

Paisa St. Ignatius Theological Seminary, Believers Church Residential School aser Believers Church Medical College & Hospital, Thiruvalla tenteta liasü.

Yohannan-i 1979 küm Gospel for Asia tentet, iba sülen küm 45 tsünga iba organization-i India, Bangladesh, Nepal aser Sri

Lanka densema Southeast Asia tesem balala nung Khrista osangtajung proktsü aser Arogo tasen tenzüksütsü atema nisung 100,000 dak tema nem training agütsüogo, ta tawa Gospel for Asia-i metetdakja liasü.

2005 küm Gospel for Asia-i dollar sen million 93 bendenteta liasü aser parnoki sayutsünger aser pastor 14,500 yaridar. Parnoki US nung Khristantem dang sayutsünger aser pastor tem yaritsü atema ita shia dollar sen semermer (30) tenla agüjang, te mepishia liasü.

Yohannan asüba osang angashia India Ato kilonser, Narendra Modi-ia social media ajanga, "Pai loktiliba tenzükba aser sensakertem taküm jenjang ajungkettsütsü atema inyakba atema pa maneni bilemtetsü. Pa tanela tesünep nung anisüngzükdkang ta sarasademtsür," ta lemsatep.

Kerala nung Angh aser state assembly nung opposition lenir natia sangdong balala ajanga mangyim jashi lemsatepba den külemi pa süadokba ya takoksa tulu, ta lemsatep.

Yohannan-i pa kinüngtsü Gisela, jala Sarah aser jabaso Daniel nung toktsür pilar. Par jabaso Daniel bo tang Gospel for Asia nung tatong tir inyaker.

## ANOGO ABEN TSÜNGREM DEN

## Tanela agi mapa inyakertem

"Kibuba tanela, shisatsü aser tangatetba... teshisadang... tashi... temetetba aser tetsübu" (Isa 11 :2)

Tanela Temeshi-i asen mapa, tejangraba aser taküm mapa ajak nung yarir. Pai asen mapa nung koda yarir tanü lesson ka repringdangdi.


Asangur Yosef bendanger lima nung liasü aser Pa tamang anemertem liasü. Ejiip nungeri pamok temeket repring (Ani. 2; 11, 12) saka Yosef-i azüklen repring. "Tsüngrem anema ni koda temenen menatsü?" (39:9). Pa dak tenükmerem aser tesempa lijakjang agi aka, saka pa lijak kümküma liasü. Kechiaser Tsüngrem Tanela pa dak liasü (Lip. 49: 23-25; 41:38). Pa tepuokdak nungi tetushi nung chuba kidangi aru. Daniel a Tsüngrem tanela akaba asangur ka liasü (Dan 5: 11; 6:3). Pa Babylon chuba tenzükba mapa nung liasü. Pa dak a tenük meremer liasü. Ajaki pa sendok. Daniel-i pa kija nokdak, ali chuba aser shiruru metsübu. Mapang shia pai Tsüngrem dang apudak. Tsüngrem Tanelai pa tasü itdaksü. Anungji pai pa tamang merakzüi Tsüngrem memetetba chuba ana tenzük (6:28).

Tanela agi asünga doctor kati tajungba operation agitsü; Tanela agi asünga engineer kati tajungba yanglutsü; tanela agi asünga tesayur kati tajungba sayutsü aser tanela agi asünga student kati tajungba azüngtsü.

Tanela agi asüngsashia kümang aser Tsüngrem tenüng sanga tenzükang. "Ya anisüngzük lir, aniseta alisang nem nenoki anisüngzük agüjang..." (Isa 28:11:12; 1 Kor 14:21)

Anepdang, nikongdang aser teruto ajak nung Tanelai onok taküm akasodakjang.

## Sayutsünger Benny Hinn-i aibelen ana atema tesasaba lemsatep



**May 10, 2024:** Kanga nungtugu televangelist, Benny Hinn-i, pai Tsüngrem tenzükba wadang inyakba mapang nung pai tiyazü shin o jembiba aser azükaruba tesayuba ajungkettsüba atema pai kanga sasar, ta metetdaksü.

"Ni tenzükba wadang nung kanga sasaba ana lir; ni kanga shisa makai shin o aiben tiyazü shiogo," ta arrshi küm 71 sayutsünger, Benny Hinn-i interview ka nung metetdaksü.

"Ni ayongzükba crusades aika nung adenertem taküm yirutsüba dang masü saka kü tenüng-a menükogo, kechiyong ni lemsatepba shin otemji atangji shin otem masü," ta pai ashi.

"Mapang kaka nungbo ni Tsüngremi kü dang langka sayur ta ni bilem, saka Pai kü dang kecha mesayu, saka ni itemji jembia liasü. Ajisüaka 1

meinyaker," ta pai ashi.

Benny Hinn-isa, Tsüngrem tenzükba wadang nung ano pai kanga sasaa bilemba kaji azükarua aliba tesayuba (prosperity theology) agütsüba lir, ta ashi.

1980s mapang nungi tenzükba Benny Hinn-i, Tsüngremi tamangertem nem sempet agütsür aser ter shilem den tenla junga agütsürtem nem anema aliba taküm den külemi rongsen jenti moatsür, ta sayutsüngia aruogo. Ajisüaka tangbo pai iba tesayuba agütsüba atema sasar, ta lemsateper.

"Tenzükba wadang tetenzüklenbo kanga tongmelang liasü. Ministry tuluba ainba mapang nung ni timtem ajangshia liasü. Ni shinga nem-a tai metongloksür. 2019 küm nungi tesüiba mapang inyakbatem atema sasa tenzük. Iba atemaji ni kanga nemjema bilemer aser tatok meshir. Tangbo ni akokba tashi Laishiba tesayuba nung ajemdaker inyaktsü atema kanga meranger," ta paisa lemsatep.

"Tang ni Kibuba dak dang rangloker. Tenzükba wadang inyaktsü atema rongsen bushidang ni Laishiba tesayuba nung dang ajemdaker inyaktsü," ta paisa shisem.

**AO OSHI ANGAZÜKDAK:  
TANÜ ANGAZÜKTSÜBA OJANG**



Tir Yimyim

**Süingbentzüta**

(n) süing aser tzü abeni aoba (fetching water and wood for home use)

\* Tanü asüing yimtak süingbentsüta mapa inyaker mali kümogo.

**Süingpen**

(n) süingdong nung apungba naro (flower of trees)

\* Süingpen apungba mapang arem topur junga angur.

**OLONG PAITEP # 6783**

15x15 crossword grid with numbers 1-19 indicating starting positions for words.

**TIPIEN**

- 1. Pongentsür dang ajaba - (7)
- 5. An-i akoba - (5)
- 6. Ta \_ \_ \_ gka - (3)
- 9. Pei indang aküm - (3)
- 11. Tzü nung alir - (5)
- 12. Talangba aküm - (3)
- 13. Yangluzükli - (5)
- 14. Ozü ka - (3)
- 17. Songtem - (3)
- 18. Ken yimya - (5)
- 19. Kumtetedakba - (7)

**LANGTSÜNGLEN**

- 2. Teimla ayu - (5)
- 3. Ajir / Penzür - (9)
- 4. O jembiba yimya - (3)
- 7. Tali anguba - (9)
- 8. Lokti tentet - (4)
- 10. Itsük tzü - (4)
- 15. Apitet - (5)
- 16. Shishilembatsü atema amshiba - (3)


**OLONG PAITEP # 6782 TELANGZÜBA**

**TIPIEN:**

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem, 15. Tambu,
- 16. Khuret, 17. Sang.

**LANGTSÜNGLEN:**

- 1. Yimti, 2. Amen, 4. Shiner, 5. Alaka,
- 6. Satan, 9. Putet, 10. Tembar,
- 11. Tatok, 12. Amang, 14. Jala.



**Künap kinungtsü tebilemba kinungbo dang shidanger**

**Kinungtsü :** Hai, kü temeim kinungbo tanep yabo asen kibong nungdak kar jembishinu asüba den külemi ni aginua bilemba kar ni nu den lemsatepner.

**Kinungbo :** Waa, kecha masü atu, tanep ya nü nüngdabaji kechiar kü dang ashitsü nai kecha arendaka melei shidangangma.

**Kinungtsü :** heee oda asen kibong ajak dang tashi Tsüingremi anema lia toktsüba den külemi taküma alima ajunga nung onok tetsütem anogo (Mothers day) atogtsü mapang anasa arur, anungji iba anogo nungji oda nia ajak mesüka sobosolemtsü asoshi teberem sü tajung ka aginua tanep ya nü dang asüingdangger ako.

**Kinungbo :** Hujatu kü temeim kinungtsü, tanep nai aginüba kü dang asüingdangba o ji koda sür intoktsütsü, süra nai iba anogo nungji na nungi shir asen kibong ajak anema lia mungtettsü asoshi nü mulungjang taroktiba agi sarasadema alir asü koda? aser shiti sürbo iba angoji temenungratsüka alima ajunga nung pei arishi meshia pei akaba süoshi tajungtiba sobor amungbaji kanga dang junger. Saka asen taküm nung ano taruba kümjia kü nem arishi moajang ta pei mulungjang nung sarasadema atatsüba dang tongtibang masü nu.

*Lilir : S. Repa Pongen*

**COCOMI-i aluyimertem nem takaratiba nung teyari agütsütsü mepeshia**



**Imphal, Monupii/May 10 (Agencies):** Coordinating Committee on Manipur Integrity (COCOMI) Farmers' Wing convener K Thoiba Meetei-i, Manipur sorkar dang May 5 nü yipru den rür ajanga tsünusenpongtsü raksatsür aliba aluyimertem nem takaratiba nung teyari agütsütsü mepeshia asüingdanggero.

Thoiba-i ashiba agi, May 5 nü rür agi state kübok tesem balala nung teraksatsüba tulu

bener arutsüoggo aser iba ajanga ki aser tsünusenpongtsü aika raksatsüoggo aser nüburtem aser talisa aluyimertem timtem nung lir. State nung aluyimertem sorkar nungi senotsü teyari kanga nüngdaka lir, aser teyari ya takaratiba nung agütsütsü nüngdaker, ta pai ashi.

Taoba mapang Manipur Chief Minister N Biren Singh-i, timtem lendong agi kongshir alirtem nem senotsü teyari

agütsütsü ta shiogo.

Iba den bendenloksema ken o dak sendaka aliba department temia yipur aser rür ajanga teraksatsüba bener arutsüba asadangoggo, ta COCOMI Farmers' Wing-i ashiba den, aluyimertem timtem mesemtsü atema senotsü teyari tapet agütsütsü mepeshia asüingdanggero, kechiyong aluyimertem kanga meranga inyaka aliba rür tsükba ajanga ajak amajok kümdaktsüoggo.

**Tripura nung National Lok Adalat nung ken o 17,000 dak tema bentettsü sentong lir**

**Agartala, Monupii/May 10 (Agencies):** Taküm atema tanabuba National Lok Adalat Honibarnü agitsü renema lir aser iba anogo ken o bangadaka alibatem bentettsütsü merangtsü.

Tripura State Legal Services Authority member secretary, Jhuma Datta Chowdhury-i ashiba

agi, iba sentong ayongzükä agiba mapang ken o 17,000 dak tema bentettsü.

Inyakyim ya Tripura High Court nung dang masü saka state kübok district aser sub-divisional court tem nung anepdang 10 ako nung tenzüktsü.

Chowdhury-i ashiba agi, ken o bentettsü atema bench 42 nem ken o 17,938 lemdanger



agütsütsü. Ken o tem rongnung, pre-litigation disputes, pending court cases, motor accident compensation cases, bank loan repayment cases, arbitrable criminal dispute cases, matrimonial dispute cases, check bounce cases, employment matters, land acquisition cases densema lir. Tripura High Court nung ken

o 46 benoktsü aser Lok Adalat inyakyim atema Agartala court nung bench ti amenoktsü. Inyakyim metenzük tsüingda telok ajak renema atatsü atema ken o dak sendaka alir ajak nem osang agütsüoggo.

Chowdhury-isa, May 1 nü nungi tenzükä Lok Adalat atema osang angazükertemi shilem tajung agia arudar, ta ashi.

Ken o bentettsü atema parnok District Legal Service Authority aser Sub-Divisional Legal Service Authority office tem den longjemer inyaka arudar. Inyakyim kecha tetsükdaksü makai aotsü atema Lok Adalat-i jaokertem nem Paralegal volunteer temi teyari agütsütsü.

**Babri Masjid meyanglutsü atema BJP-i menden 400 kokner: Assam CM**



**Guwahati, Monupii/May 10 (Agencies):** Assam Chief Minister Himanta Biswa Sarma-i Mongolbarnü Odisha kübok Malkangiri nung Bhartiya Janata Party (BJP) indang rally ka nung shilem agiogo.

Rally nung o jembiba mapang pai, Congress-i Ram

Temple melena Babri Masjid yanglutsü akok, aser ibayongji BJP-i Lok Sabha election nung menden 400 kokner, ta ashi.

Malkangiri nung lokti senden ka nung o jembiba mapang Sarma-i, "onoki kechiba menden 400 aginer ta nüburtemi asüingdanggero. Congress-i Ram

Temple melena Babri Masjid yanglushitsü akok aser ibayongji onoki menden 400 aginer," ta ashi.

Paisa, "Babri Masjid ya India nung kodanga meyangludaktsütsü atema onoki jenjang agitsü nüngdaker. Ibayongji PM Modi nem menden 400 dak tema agüja pa PM kümdaktsütsüla," ta ashi.

Maneni Sarma-i ashiba agi, "taoba mapang Congress-i Ram temple yanglutsüba anogo asüingdanga liasü. Tangbo parnoki iba ya masüingdanggero. Onoki Ram Temple kija yanglur manentsü ta Congress-i meteta lir; linük nung temple ajak salatsütsüla. Onük kanga talang lir."

# Gaza ceasefire ken o telemtetba makai tembangogo



Hokulbarnü Israel mitkari tayimtsü amshia Rafah yimti amakdang ki o jen raksar aliba noksa nung angur.

**Gaza City, Monupii/May 10 (Agencies):** Israel mitkari Gaza south tsütsü Rafah yimti amak tenzükogo aser Gaza City nunga amak, aser Palestine nung aliba litsü nungya humanitarian aid operations kecha magiteter aser ceasefire ken o telemtetba makai tembangogo.

United Nations Relief and Works Agency for Palestinian Refugees in the Near East (UNRWA) ajanga Hokulbarnü ashiba agi, Palestine nung 110,000 shi Rafah nungi jena ogo. Israel sepaitem iba yimti anüdoklen nungi raratsü renemer aor aser anünglen nungi tayimtsü amshia amaker.

"Nüburtem tetsübo agi marakzüteter. Nüburtem mapang talangka nungi tetsübo nung aru aser tang tsüboa aliba tongogo," ta UNRWA indang director of planning, Sam Rose-i Rafah nungi osangbener dang ashi.

Israel sepaitemi Rafah arütsü alema senzüba tesem amokbangogo, anungji humanitarian aid atema tongtipang entry point shibanga lir.

"Gaza telungi Deobarnü nungi teyari kecha maiter. Teyari oset, totzü, chiyongtsü kecha maiter. Aser tang onok nungdangba osettsüset ajak tatemer," ta Rose-i ashi.

"Onok anogo ishika achi-ajemtsü atema am tera anünga lir. Saka totzü aser tzi malinung tanünga ajak yakta shibangtsü. Anungji tensa kanga majung lir," ta pai ashi.

Kanga sashia amakba mapang shiranger aser staff

tem Rafah nung aliba mozüki tem nungi jena aotsüsa akum, anungji Palestine nung shiranger aser yirur alir aika anepalutsü lenmang maka.

"Al-Najjar Hospital nung service mali. Aser Kuwaiti Hospital (Rafah nung aliba) ya trauma aser emergency atema dang lir. Kanga sashia shirangertem anepalutsü atema yipten mesüra mozüki mali," ta Palestinian doctor Mohammed Zaqout-i ashi.

Ano north tsütsü Gaza City nung Zeitoun, Sabra, Nassr, Tal al-Hawa, aser Shati refugee camp nung tenük yoker tayimtsü amshia amakba aser raraba lir. Central Gaza City nung Israel-i kibong ka aliba ki amak aser iba mapang nisung asem asü aser pongu yirua liasü, ta Wafa news agency ajanga ashir.

Qatar, United States aser Egypt tetsüngtai ia ceasefire ken o tesüsaba jembiba sülen Israel aser Hamas delegations tem Egypt yimtiba Cairo nungi ogo. Palestine nung Hamas teloki Hokulbarnü ashiba agi, yimjung asoshi tangbo Israel dak dang keta lir.

Ceasefire asoshi tezüngzüktep ka yanglutsü aser Palestine nung tepuokdak alirtem aser Gaza nung pua alirtem melenteptsü atema anatsülen nungi atsü-anem akatsüla, ta Egypt indang Ministry of Foreign Affairs ajanga ashi.

Hamas-i tezüngzüktep nung aginüba ya teti asoshi ceasefire ka atema Israel sepaitem Gaza nungi ainshitsü, rara ajanga tesem balala nung

prokshia aliba Palestine nungertem tanaben meyipa shilangtsü, aser pua alirtem tepuokdak alirtem den melenteptsü dena lir.

Hamas-i hopta 12 rara anena atatsü akhangba ya tan hopta ceasefire ken o jembidang Israel-i soitba onük tongtipang ka liasü.

Israel indang tanks tem eastern aser western Rafah sadangba lenmang tonga aitogo anungji iba yimti anüdoklen jungjunga lungbangogo, ta osang ajanga ashir.

Rafah anüdoklen aser northeast tsütsü ola tulu adoka apokba aser khatepba ola maneni angashir.

Israel-i Rafah amaktsü temulungtetba nung lir, long tesem balala nungi Palestine nung million 1.4 iba yimti nung jenoka lir.

US densema Israel mitkar aser yimten yarir allies tem aser UN nungiba iba yimti mamaktsü tekumdangtsü shia lir, saka Israel-i mangar.

Rafah yimti makra US-i Israel nem nok-nü teyari agütsüba kar anentsü, ta US Tir Joe Biden-i tekumdangtsü shiaka Israel Ato Kilonser Benjamin Netanyahu temulung meranga lir.

"Asenok kija nokdatsü asünunga asenok kisung nokdaksü. Nüngdakra asenok teka temezüing agia raratsü. Ajisüaka asen ket nung teka temezüing dang tali lir," ta pai Brehostibarnü sendaksem ka nung shia liasü.

US Secretary of State Antony Blinken-i Congress nung Israel-i Gaza amakba osang Hokulbarnü agütsütsü lir.

Kasa mapang UN General Assembly nunga Palestine nung nem temeden aser maongka tasen agütsütsü asoshi pangzük ka nung vote agütsüteptsü lir aser UN Security Council dang Palestine-i züngsem asoshi asüngdangba kanga junga shisadangtsü ayongzükka lir.

# Zelenskyy-i pa indang bodyguard tekolakba mapa nungi anentsü



**Kyiv, Monupii/May 10 (Agencies):** Ukraine Tir Volodymyr Zelenskyy tepsettsü meranga tasa yangluba mechi pa takum kumzükka ayutsüpur unit nungi nisung ana apuba sülen pai iba unit tekolakba mapa nungi anentsüogo.

Serhiy Rud-i 2019 nungi Ukraine tir indang security detail anir liasü.

Pa mapa nungi anentsüba atema kuli kecha magütsü, koba presidential decree tongmelang ka sangdongba nung shia liasü.

Ajisüaka state guard administration (UDO) ya tir kisung masü saka Ukraine nung tongtipang nisungtem aser parnok kinunger kumzükka ayutsü asoshi kanga tongtipang lir.

Mongulbarnü state guard nungi apuba colonels ana ya Russia indang FSB security service-i lapoka aliba network of agents nung lir südi ta temulung melemeti lir.

Zelenskyy-i aiben Russia nungeri pa tepsettsü meranga tasa yangluba indang jembia aru, saka tang tesüsa temai adokba nung pa anüker dena lir, aser military intelligence chief Kyrylo Budanov aser SBU state security service tekolakba, Vasyl Malyuk nung daka tenük yoka liasü.

Tan hopta Malyuk-i iba tasa ya Putin nem sempet ka ama Mongulbarnü pa kümsük pongu buba metenzükdang agütsütsü, ta shia liasü.

Tir Zelenskyy indang bodyguard den kanga junga tesendaktep alirtemi pa pua

bener oa tepsettsü liasü, aser Budanov dak rockets, drones aser anti-tank grenades agi amaktsü liasü, ta SBU ajanga ashi.

Arishi küm 47 tain Serhiy Rud ya item taittsüba nung sendaktepa aliba mesayur, ajisüaka pua aliba colonels ana rongnung Andriy Huk ya pa indang tembar tajung ka ama ajiteter. Tena ya küm aika tejakdang border troops academy nung külemi azüing ta ashir.

Maj Gen Rud ya lanuwa talangba Ukraine indang mitkar nung tenzükka aru aser iba mapang timba state security inyaka liasü.

2022 küm February ita nungi tenzükka Russia-i tashi ajak amshia Ukraine makyonga arudang Russian paratroopers tem Kyiv nung anenzüker tir Zelenskyy tepsettsü meranga arur.

Rara tenzükdang Ukraine leniri pa ya Russia indang "number one target" lir ta shia liasü. Tir Zelenskyy-i mapang shia Ukraine indang security forces nung tongtipang nisungtem melenshia arur aser Brehostibarnüa pai commander of special forces, Col Serhiy Lupanchuk melenogo ta sangdonga liasü.

Russia-i tashi ajak amshia küm ana Ukraine amakdang par defence anisang Gen Valerii Zaluzhnyi ya February ita melen. Pa tangbo Ukraine ambassador to UK shima lir aser pa nem "Hero of Ukraine" tenüing jaloktsü.

# Israel sepai-i Al Jazeera office meita ao

**Nazareth, Monupii/May 10 (Agencies):** Israel-i ajungbena Nazareth nung aliba Al Jazeera studio meita ao ta ashi, koba linük aser broadcaster tsüngta mepetmesü adokba rongnung tasenba alitsü.

Communications Minister Shlomo Karhi-i iba media company nem "Hamas loudspeaker" ta tenüing jaloktsü aser Brehostibarnep Israel north tsütsü aliba yimti nungi osettsüset apu ta ashi.

Parnok ya Israel security asoshi timtem lir ta jembiba ya lendong aketba aser temenenütsü tiazi lir, ta Al Jazeera-i taoba mapang shia liasü.

Deobarnü occupied East Jerusalem nung Israel sepaitemi iba broadcaster

indang office ka dak tenük yokba sülen tang iba tatalokba osang ya angashir.

Al Jazeera aser Israel sorkar tsüngta mapang talangka nungi tesendaktep mejungi lia aru, saka Gaza nung rara tenzükba sülen tamajungba akum.

Bendanger osangbener tem Gaza Strip telungi maittsü tenokdangba agüja lir, anungji yangji alir Al Jazeera staff kari raraba osang bona liasü.

April ita Israel parliament ajanga Al Jazeera densema TV channel tem indang broadcast nokdangtsü asoshi sorkar nem tashi agüja ozüing ka agizükka liasü.

Deobarnü Israel sorkari par linük nung iba channel

shibangtsütsü mera agi aser Ato Kilonser Benjamin Netanyahu-ia Gaza nung tang teraradak lia iba channel shibangtsü cabinet-i mulungogo ta shia liasü.

Brehostibarnep Karhi-i social media X nung noksa ka lemsatepba nung Israel sepaitem ki tuluka kima aliba nguogo.

Pai Nazareth nung aliba Al Jazeera studio ajungbena meita aotsü totuyuba agütsü ta pai iba post nung shia liasü.

"Ministry of Communications inspector temi Northern District Police Tactical Division den külemi yangji tang osettsüset apuba mapang lir," ta Karhi-i ashi.

(Maneni tapak 8 nung...)



May 10, 2024 : Nisung 85 mena aliba Boeing 737 tayimtsü ka nung mi jangrua Senegal indang airport tulutiba nung runway alema ao aser iba lendong nung pilot densema nisung ter yiru, ta Senegal transport minister-i Brehostibarnü ashi. TransAir meyong Air Sénégal tayimtsü ya Bodhbarnü menur Bamako lenir aorba liasü, kong passenger 79, pilots ana aser cabin crew pezü liasü, aser iba lendong ya Dakar nungi mile 31 shi pilar Blaise Diagne International airport nung atalok.

# T20 World Cup atema India team May 24 nü apusotsü

**Monupii/May 10, 2024 (Agencies):** BCCI secretary Jay Shah-i, taruba World Cup atema India team apusoa aotsü asoshi mapanglen jangjatsüogo. Shah-i, asyartem shirnok ILP team tem playoff tonga masayatetlir parnok mezüing apusotsü ta ashi.

Shah-isa, IPL playoff tonga masayaba team tem nungi asyartem shilem ana kuma lemsar T20 World Cup atema apusoa aotsü, ta metetdaksü. Mezüingbuba telok nung coaching staff aser asyartem May 24 nü apusoa aotsü aser tanungba asyartem ya IPL final

asayaba sülen May 26 nü apusoa aotsü.

IPL final league asyatem nung playoff-i aitsü atema timla maliba team nungi India nunger asyartem anisüingzudaksütsü asü ta asüingdangba mapang, Shah-i iba asayamung ya parnok atema sempet arangtetsütsü atema sabang tajung ka asütsü ta ashi.

"Travis Head aser Abhishek Sharma nati koda junga asaya repringang. Bumrah-i Head batting amenba mapang bowling aontsü maongka ngura iba dang nungi practice tajungba kong angutsü," ta Shah-i ashi.

Iba den bendenloksema Shah-i Lucknow Super Giants' bowler Mayank Yadav indang metetdaksü shiba yirur lir. Taküm IPL tenzükba mapang Yadav-i kanga junga asayaogo ta shia Shah-i pa BCCI-i anepalutsü, ta ashi.

Yadav ya Akash Deep, Vijaykumar Vyshak, Umran Malik, Yash Dayal, aser Vidwath Kaverappa nunger den annual retainers maliba pace bowlers tajung rongnung ka kümogo. Item bowler tem ya National Cricket Academy (NCA) medical staff-i maneni teyari agütsütsü.

# Yarraji-i Netherlands nung 100m Hurdles gold angu



**Monupii/May 10, 2024 (Agencies):** India tsür Jyothi Yarraji-i Brehostibarnü Netherlands kübok Vught nung Harry Schulting Games 2024 athletics nung tetsür 100m hurdles asaya nung gold medal nguogo. Ajisüaka la 0.10 seconds agi Paris Olympic Games atema qualify mesüteti liasü.

Europe nung outdoor season mezüingbuba asayaba mapang Asian Games silver medallist Jyothi-i 12.87 seconds nung alizüing tongteta gold medal angu. La sülen Dutch tsür Mira Groot (13.67 seconds) aser Hanna van Baast (13.84 seconds) na tanabuba aser tasembuba jenjang nung liasü.

Ajisüaka tia maka Yarraji-i alizüing 12.87 second nung tongtetba sülen la Olympics atema 0.10 second agi qualify mesütet, kechiyong Olympics atema qualification markji 12.77s lir.

Kasa anogo Jyothi-i 100m hurdles final atema alizüing

13.04 seconds nung tongtetba sülen qualify süa liasü.

Jyothi, shiba Reliance Foundation High-Performance Centre, Bhubaneswar nung taining agir, la tang agi tanabenbuba Olympics atema qualifying mark metongteti liasü. World University Games Chengdu, China nung asayaba mapanga lai alizüing 12.78s nung dang tongteta bronze medal ngua liasü.

Jyothi shibai taküm küm tetenzüklen Asian Indoor season nung junga asayaogo, la Olympic qualifying asayaba mapang ano asayamung pongu nung shilem agitsü. Olympic qualifying ya taküm June 30 nü tembangtsü.

Kasa mapang nung India nunger Tejas Shirse-i kasa asayamung nung 110m hurdles nung gold medal nguogo. Pai alizüing 13.56 seconds nung tongteta Dutch nunger Joas van Hellemond (13.80 secs) aser Jamie Sesay (13.92 secs) na jangkang liasü.

# Atalanta aser Leverkusen na Europa League Final asayatsü

**Monupii/May 10, 2024 (Agencies):** Brehostibarnü Europa League semifinal asaya tanabuba leg nung Atalanta-i goal 3-0 agi Marseille akokba sülen tang mezüingbuba Europa League final tongtetogo.

Asaya nung Ademola Lookman, academy nungi anitetba asayar Matteo Ruggeri aser El Bilal Toure nungeri goal kaka idaktsüba sülen 4-1 ta aggregate nung Atlanta pur tang mezüingbuba European final kati iogo.

Atlanta pur iba ita tatemlen Dublin nung Bayer Leverkusen den final asayatsü. Semifinal asaya nung Atalanta puri asaya amokbanger asaya aser Marseille nem goal idaktsütsü atema kecha maongka magütsü liasü.

Asaya nung minute 52buba nung Ruggeri-i tanabuba goal

idaktsüba sülen Atlanta asoshi iba asaya akoktsü atema kecha timla maliasü aser iba sülen ano Toure-i mapang apuloktsür asayaba mapang tasembuba goal idakja liasü.

Gian Piero Gasperini lenisüba nung Atalanta team-i taküm kanga junga asaya arudar aser takok marok ana tashi bener iba season tembangtsü akok, kechiyong parnok Bodhbarnü Italian Cup nung Juventus den asayatsü lir.

Atlanta puri tang tashi nung 1963 küm dang Italian Cup koka lir aser European competition nung talangtiba atubaji 1988 Cup Winners' Cup semifinal tonga asayaba asütsü. Iba mapang parnok second division team ka liasü.

Kasa mapang nung tanga semifinal asaya ka nung Bayer Leverkusen aser Roma na goal 2-2 agütsür asaya tembangba

sülen Leverkusen pur Europa League Final-i iogo aser iba asaya densema parnok asaya 49 tashi khen danga tamakok mongui asayaogo.

Asaya nung mapang apuloktsür asayaba mapang Josip Stanisic-i goal ka idakja goal 2-2 nung tembangba sülen parnok 4-2 ta aggregate nung final-i iogo.

Semifinal mezüingbuba leg nung Roma-i goal 2-0 agi Leverkusen mekoki liasü ajisüaka tanabuba leg nung Leandro Paredes-i penalty ajang goal ana idaktsüba sülen telok ana tsüingda kasasa aküm.

Ajisüaka Leverkusen atema Alex Grimaldo-i goal ka idakja parnok nem timla agütsü aser mapang apuloktsür asayaba mapang minute tenetbuba nung Stanisic-i par team atema tanabuba goal idakja goal kasasa aküm.

# Dominic Thiem tennis asaya nungi anener



**Monupii/May 10, 2024 (Agencies):** Taoba US Open champion Dominic Thiem-i ashiba agi, pa tekanük yiruba ajanga career nung kongshiba sülen takümküm tatemlen asaya nungi anentsü.

Arishi küm 30 tain Austrai nunger asayar, shibai Grand Slam finals pezü tonga asayaogo, pa October ita kidang Vienna nung asayaba sülen asaya nungi anentsü imla atadar.

"Iba osang ya kanga dang tongtibang, tejashitsüka aser

kanga tebur tajung lir kechiyong ni iba season ya tatembangbuba asayatsü," ta Thiem-i ashi.

"Kuli kar ajanga ni asaya nungi anentsüa kümogo aser mezüingbubaji tekanük yiruba ajanga lir. Tanabuba nung ni iba atema mapang talangka bilema aruogo.

Thiem-i pa indang career nung Grand Slam ka koka lir, koba 2020 US Open akokba asütsü. Iba asayamung akokba sülen pa alima nung asyartem rongnung tasembuba jenjangi atu.

Pa taoba mapang 2018 aser 2019 French Opens aser 2020 Australian Open nung runner-up liasü.

New York nung takok anguba sülen küm ka majung tsüingda Thiem tekanük yiru aser iba ajanga pa ita 10 tashi masayatetsüsa aküm aser pa indang rank-a top 350 dang nungi tajemba kuma liasü.

Thiem taoba küm top 100-i iogo, saka taoba mapang ama junga masayateti aküm.

March ita pai, pa tekanü ano tera yirushiba indang metetdaksü saka taoba ita Estoril, Monte Carlo, Munich aser Madrid nung asayaogo.

"Ni kodanga imla maliba asayamung aser takok maroktem ngutetogo. Ni jangradema asayaogo," ta Thiem-i ashi.

2020 US Open final nung set ana mekoki aliba nungi meyipa tur Alexander Zverev akokba ajanga Thiem ya Grand Slam champion ka ama teti bilemtetsü.

## BENDANGLI OSANG : Tapak 7 nungi...

### Israel sepai-i Al Jazeera office...

"Asenoki Israel nungi Hamas loudspeaker nem broadcast mesüdaksütsü."

Taoba mapanga iba network yagi Hamas den khenyongi sendaktepa mali ta shia liasü aser Israel ketdangsurü tai tongloktsüba khenyongi magizüker ta Deobarnüa shia liasü.

Police temi occupied East Jerusalem nunga Ambassador hotel nung broadcaster indang office ka Deobarnü meita ao.

Kasa anogo Al Jazeera-i sangdong ka nung, meimchir temeden aser osangtsüsang metettsü temeden nung aibelena mapa tamajung inyakba aitsür, ta shia liasü.

International aser humanitarian law den mapet

Israel-i 'free press' ajembanger aser osangbener tem dak tenük yoker aser tepseter, ta broadcaster ajanga shia liasü.

October 7 nü Hamas teloki Israel south tsütsü maka nisung 1,200 shi tepseter ano nisung 252 pua bener aoba nung telangzüba agüja Israel-i iba telok ya samatsütsü campaign ka tenzük.

Iba sülen Gaza nung nisung 34,780 dak tema tepsetogo, ta Gaza nung Hamas meyong health ministry ajanga ashir.

Iba rara tenzükler osangbener aika tepsetba atema alima tesem ajungalen nungi Israel aitsür saka parnoki telungpur dak dang tenük yoker ta Israeli Defense Forces (IDF) ajanga ashir.

**BILEMDANGANG**  
"Sempet keta aliba mamshira sama aotsü."